

G R Æ C I A.

Græciæ & Græcorum, ut & Ionum & Dorum & Achæorum, nomina nondum erant nata: postea vero heic primum orta, alia universam gentem & regionem quam Græcam & Græciam dicimus, alia per amplissimas ejus nationes diffusa celebrari cœperunt. Nam Deucalionis hujus filius Hellen regni sedem in Thessalia inter Peneum & Asopum fluvios, circa Phthiam habuit, ac regno illi *Ἑλλάς*, regnicolis *Ἕλληνες* nomen ex se dedit, quibus sequenti ævi Phthiotides, & Phthiotarum appellationes à posteritate sunt tributæ. Hellen verò regno hoc Helladis filiorum suorum maximo tradito, reliquos ad quærendas sedes alias dicitur dimisisse. E quibus Dorus juxta Parnassum montem fertur constitisse, & regionem Dorida, populumque Doriensem appellasse: unde universum genus Doricum sequenti tempore fuit propagatum. Xuthus ejusdem Hellenis filius in terram Atticam profectus, ut à majoribus traditum est, Erechthei regis filia con-

jugio sibi juncta, colonos Oenoæ, Marathone, Probalinthei Tricorythi constituit. Hujus filiorum alter è filia Erechthei natus Achæus, ob eandem à se inconsulto patratam, profugus in Peloponnesum concessit, & sede in vicinia Lacedemoniæ posita, habitatores ejus loci de nomine suo Achæos vocitavit. At alter Xuthi filius Ion Ionum nomen terræ Atticæ primum intulit. Vnde cum nimia populi frequentia regio hæc non satis fertilis laborare sensim inciperet, colonia in Peloponnesum quoque emissæ fuit, quæ tractum illum, quem insedit ad mare, Ioniam nuncupavit. In eadem Thessalia antiquissimis temporibus Pelasgi, populus vagus ex ea regione, quæ Arcadia posteris dicta fuit, profectus, durus, & vi armisque promptus, confederunt, & partibus ejus in potestatem redactis, & ab se denominatis, ex ea sede se diffuderunt, ac loca varia occuparunt. Vnde factum, ut è more ætatis suæ Homerus identidem voce Pelasgorum quosvis Græcos affecerit.

